



Chamna Aw

(A Monthly Organ of the Evangelical Synod Church)

Vol. XXXIV

No. 07

October, 2019



2019
KUM
THUPI:

“THUOKHAT TAKIN TAI HITIU”

HEBRAI 12:1

Editor: Rev. T. Kamgin Gangte

Vol. XXXIV No. 07
October, 2019

Editorial Board

Chairman:

Upa Dr. L.S. Gangte, M.A. M.Phil.

Editor:

Rev. T. Kamgin Gangte, M.Th.

Asst. Editor-cum-Circulation Manager

Rev. Khaitinthang

Bible Study:

Pr. Khailalsiem M.Th.

Evan. Paukhomang B.D.

Contributing Editor:

Upa Paozalun BA

Rev. Khaigin BD

Rev. L. Sata B.Th.

Rev. Thangkhoiem M.Div.

Rev. T. Kampu M.Th.

Rev. Henkhlien MBS

Miss Chinbawi MRE

Editor ana hite

- | | |
|------------------------|-----------|
| 1. Upa Lalkhogin | 1986 |
| 2. Rev. Khaigin Gangte | 1987-2005 |
| 3. Rev. Lamkhawsat | 2006-2013 |
| 4. Rev. Thangkhoiem | 2014-2017 |

contents


- Editorial..... 01
- Thuokhat takin tai hitiu 02
- I ginchak uh bangloding ahi!..... 06
- Nang unnek ding pieu in..... 09
- A sietlohona dinga daikai 11
- Pastor's Fellowship & Seminar 13
- Nazaret Isu ahi die, khawvel thil 15
- Isu Krista Kross putpih 21
- Mission Column 24
- Krista lungthim kha nangmau ah um hen.....26
- Lainatna 29
- Thupi: Kalvari 31

- Kumkhat lakman Rs. 150/-
- Thusuoh nuom nei te'n ESC Office
Post Box-54, Chiengkawnpang,
Churachandpur a thak ding.
- Ala nuom leh a man pie nuom te'n
circulation Manager, hetsak ding.
- Thukisuoh cheng hi ESC Ngaihdan
ahi vek khel puoi. Article zikte'n a
mawh a kipuok chiet ui.

CHAMNA AW PHUNGVUKNA DING

- | | | |
|-------------------|---|-----------|
| 1. Chief Patron | - | ₹ 5000.00 |
| 2. Patron Member | - | ₹ 4000.00 |
| 3. Diamond Member | - | ₹ 3000.00 |
| 4. Gold Member | - | ₹ 2000.00 |
| 5. Silver Member | - | ₹ 1000.00 |

PRINTED AT
THAWNSAAU PRINTING WORKS
CENTRAL LAMKA

Ipu I Pa teu in, “Hun leh Tuiluong in kuo mah angak ngei puoi,” a na tihsek uhi adik thei mah mah zieng hi. Pathien venna tawh October tha I tungto kit taua ei vengtu Pathien chu pakchai tiu.  Mihing in hinkhuo chawmcha I neih sun uhi hun leh tui luong guol in a chieh zing hi. Pathien in ahun leh a mun ei na tiemsak I hun tawpna ding lam zuon a ni chenga naih deuhdeuh I hui ui. Hun chieh dan hih ka ngaihtuoh sek a, Sapte thuching in, “Do not judge people by their past, people can change, develop, and makes a progress,” Zie hi Kristien te nungchang ding leh lungput ding hi’n ka mui. I hun chiehsa gela hin khuo matmat sang in I hun hungtung ding gel in hinkhuo kimang zaw leh a phatna tamzaw dingin ka gingchai. Mihing in hinkhuo I mat hih, hun thum in a khen theih a, Past, Present, leh Future. Na hinkhuo a hun chiehsa (Past life) na gel tieng leh na kipahna, na dahna, na kisikna, kihel to zeng zung mai thei ahi. Ahi’n zie a pawimawh mahmah khat chuh past life ahizaw puo a, na present life chun na future life ding chuh bangtawbang ahih ding ahim? tih hi ahi zawi. Pathien cha te leh Pathien a hinna neita te a ding diek diek in tawbanga lunggel neih chuh alo theilo ahi.

Bangti’n khawsa leng un le hun hih a chieh ngei in a chieh zinga, bangtik ahim chuleh I tunna ding chu kitung tho tho ding ahi. Zeziekchun, ka tunna ding hih khawitak ahim, tih gelzing kawma hinkhuo mang ding in Pathien buon hitiu.

THUOKHAT TAKIN TAI HITIU

*Rev. T. Kampu
Missionary, Assam and beyond*

“**Taih**” tih thumal in a gennawp leh akawk zieng thil khat chuh, mi dangte sanga taihhat zawk ding leh kipahman akhatna ahim, anihna ahim bek mu dinga tai tih hi ahi. Zie hi “kitaihsiekna” running race I tih uh kha ahi.

Aum zie: Zie kitaihsiekna hi, a khatna, a nihna lawmman kichuhna ding ahi puoi. A taihhat sang in, thuok hattaka **taih tung** hi ahi pen hi tih hezing kawm in, tai zel hitiu.

Kitaihsiekna a pangthei ding titna/qualification:

1. Hinna nei:

Oh... Hinna neilo mi a taiviel, a tawiviel I mukhau em? Hinna neite chauh, tawi thei, tai thei, khang thei ahih zie hi thumawlcha thubul himahleh a pawimawh zie hi alien mahmah hi. Hun Lui, Thuthunlui hun ah, Pathien in lam chuomchuom in mite a hopih a, adiek in, vansawlchakte, manglamte, vaulam te, chun, Thiemgaute mangin thu a gen sek hi. Chun, huntawp lam ah A Chapa Isu ah mihiem hetding pawimawh cheng ahung gen zo tai.

Pathien Aw, Pathien Thu I hetding dan, I zak ding banga zakna hin Hukdamna, Pienthakna aum sek hi. Isu thisan vangin gitlohna chengcheng sawphtien leh ngaihdam ahi, Heb. 9:22. Hallelujah. Zie ngaihdam chate gitlohna chengcheng, Pa Pathien in kumsawt adin a hengil a, he talo mai ding hi, thil nuompen khat ahi, Hallelujah, Heb. 8:12b; 10:17.

Zie Hukdamna lopi tak neite leh Hinna neite chauh hi zie kitaihsiekna a pang thei chauh ahiiu hi. Gitloh ngaihdamna ni, Pienthak Ni apat kitaihsiekna a pang ngal ahiiu hi.

Khai le, tai khawm pan tai tiu... tai zel hitiu....

2. Hatna leh Hihselna nei:

Israel chate, Aigupta gam taihsan in, gamthipa a vakvaihnaua a buoina lienpente khenkhatte chu, 1) Phunchiekna 2) Milim hona 3) Utchakna phalo leh 4) Numei pasal kal thu a thanhuoina haw ahi. (I Kor. 10) Zie haw ziek a hih hisello, hatzo lo ahii hi.

Pathien ahet ding bang ua helo, a zuih ding bang ua a zuihloh ziek un a hisel puou a, chun, a khang thei puoi hi. 5:11-14, Thagau lam an gum nekzawm zel apawimawh hi. Zie an gum chuh Pathien Thu Bible ahi. Pathien 1:2-3, hunlui ah Thiemgau te, Manglamte, Vaulamte mangin thu ana gen sek a, mahleh tu hun a A Chapa Isu mangin thu a gennawp, pawimawh cheng a gen zo tai. Chun, Bible, lekhapek ah Pathien gennawp cheng kimtak in zik ahi. Bible hi I taihna lam tuongpi ading a **VAK**, thagau **AN** ahi.

3. Ginna Nei:

Heb.11:06 Ginna/taksanna neilo in Pathien sukkipak zawh guolloh ahihdan muh ahi. Pathien a um hi ngal, muhtheih loh chauh ahi. Khawvel ah thil tampi muh theihloh aum ui. Ginna hi thagau lam gam ading a, muhtheihna **MIT**, khawih theihna **KHUT**, chieh theihna **KENG** ahi tih I hetding ua pha ahi. Chun, Ginna hi Pathien Lungsietna gitloh ngaihdamna tui hung luonglut theih **GINNA PIPE/TUILAWNG** ahi.

Muhloha gingchate a hamphat zawk dan Isu'n ana gen hi, John 20:29. Chun, Peter in Amah/Isu chu muhlo mahleh, na hepih un, na taksang un, kipahna lien tak a neih dante muh ahi. I Per. 1:8. Ginna'n aum lo ahung um thei a; chun, a um, muh theihlohte amu guol in taksanna apiei.

Ginlahna soul hi, gitloh lak a akhawkpem, Pathien chawlhdamna chanzawh louna ahi. 12:1 ah “ gitloh ei mau a bek chak” tih hi ginlahna soul khawk tak genna ana hi.

4. Thienthona Nei:

Zie kitaihsiekna lampi hi Thienthona lampi ahi. Krista Thienthona bukim pienthak hun ah piek leh chan ahi. Ahin, nicheng hinkhuo

ah, Thienthona apawimawh zing hi. Thienthona leh hiselna achiekhwam a, chun, kipahnate le. Pathien mel muhtheih loh a gen hizing mahleh, mithiengthote hin Pathien **Mel** muzel hi dan ahi, 12:14.

Pathien naihte chu a hung thiengtho deuh deuh ua, chun, a naihte chun mahni thientho lohna haw a kimudawk deuh deuh kit ui. Thienthohna hi Pathien naihna pen ahi.

Kei mah ka thiengtho guol in thiengtho un, Kei ka thiengtho ngal a, Lalpa'n atii.

5. Thuokhatna leh Tupna Nei:

Zie kitaihsiekna ahin Tupna kungmun chu et-chak kei a, et-zing zing ding ahi. Zie kungmun tawp a um Lal Isu chu et zing ding ahi. Amah I et zinglai in, thuokhat tak a taih aum thei chauh hi. Thisan pawt khawp a suol do kawm ah pan ngai ahi. Lungkiek baih hi thil bangkim subuoitu ahi nuom sek hi. Lailong (L) khuo lutna a suong kidawh khat ah: The secret of success is PERSEVERANCE tih sap pau a kizik 1992 July tha vel khan ka biel fanna ah ka na simkha a, adik in alopi khawp mai hi. Lawhtitna thuguk hi THUOKHATNA, PAN TUN TUNNA AHI.

6. Pa Thununna

Hitia, kitaihsiekna lam tuongpi a I taihkawm zing lai un, a changleh mi khenkhat lamthang lam ah pet deuh, nung tawlh deuh te hi Pa Pathien in a thunun sek a, A chate dinmun tawh kituok in, a thunun sek hi. Zie a A thununna hi thiltup lienpen khat a neih chu, THIENTHONA AHI, zie thununna school a training zote chun, gahpha, diktatna leh Thienthona haw a gah sek ui. Pa thununna ka thuok lai in tih la athute kha enpha kit hitiu.

7. Kinepna Hing Neih:

Zie kitaihsiekna lamtuongpi a I taihkhawm lai un, a tawp tieng a I taih tung theihna ding un, thuokhatna a pawimawh takzet hi. Thuokhat tak a I taih theihna dingun, kinepna hing neih apawimawh kit hi. Zie kinepna/hope hi apawimawh zie I Kor.

13:13 ah muh ahi. Thil thum pawimawi pente laka **KINEPNA** hi khat a pang zo ahi. Kinepna hing muh tei ding kinepna ahi. Tita 2:11 ah “Kinepna Thatnawpum” (blessed hope) tih a gen ahi. Herai ziktu’n a simtute a sukhat, a taihtung tei ding a lunggel a neih chu...mailam et (future)... zie chu Isu leh Vangam, Khawpi thak, Homeland thak lam en-zing ding a nget ahiu hi.

(**pulling power**, ei kaitu).

Chun, zie Hebrai ziktu hin, ei haw a tailaite taihhatna ding leh taihtungna dingin, Thuthun Lui ah Ginna a Galhatte, ei **SAWNTU** dingin amang kit hi (**pushing power** of the OT hero of faith)

Thukhakna

Hatna Thuguk Thum:

(1) **Pathien Thu/Bible** Thagau An leh Nawitui hi nek zing a dawn zing hi apawimawh takzet hi.

(2) **Chun Pauchamna**, Pathien tawh kipawlna hi ahi kit hi. Lal Isu, ei Hukdampa in, Pa Pathien

chaglama um, ei haw I taihhat ua, I kitaihsiekna muolsuoh dingin ei ngetsak zing hi tih hetzingna hi thahatna thuguk lienpen khat ahi, Heb. 7:24-25.

(3) **Ginna a Isu lam chauh etzing**: Thagau gam, Pathien gam, Pathien tih haw hi A UM MAHMAH, muh theih loh chauh, Ginna a muhtheih chauh ahi tih hezing kawm in Isu lam chu enzing kawm in tai hitiu.

Ei Hukdampa adinga leh A gam ading a I sepgim gahte, I gimtheihnate, I sepgahte khat chale athawn ahih loh zie he a, thuokhat tak leh ginum taka zie kitaihsiekna ahih I taih tung theihna dingun, hatna tincheng in ei thuom ta hen. **Amen!**



I GINCHAK UH BANGLO DING AHI!

-Rev. Khaitinthang

Ka kuol zinglai in ka na ipmu a, zie phet chun Pathien in tununga miten I thuok ding u leh thil um dingte ei muhsak a, Vangam zuon in vansawlchak hileh kilawm tak puon vam silh khat hin ei kitawn pih a, khutia ka chieh zinglai uchun Van kawt khak tung ding kuon ka hi tau a, zie phak madeuh cha achun, chawlhmun nuomtak mai hi aum a, ziechun mitamtak le ana kichawl ua, keile zie achuh kichawl dingin ei ti a. Ken, Hepu, Van kawt tung ding kuon ki hita a, bang bawl dinga zie ahih kichawl ding I hiu em? ka tih leh, Amah chun, khuti hin ei hun dawng hi, “Zietak ahih khuovela taksa x-ray lak ahih sek guol khan, lungthim lam x-ray lakna um ding ahi.” ati a. Ken, Hepu, bang ati a zie chuh pawimawh ahim? ka ti leh, amah chun ziechuh alotheilo ahi, Vangam aum dingte chuh a thiengthonau em tih hi etchet ngai ahi. Khuovel akhan taksalam thienthona leh damna et ahi a, zietak ahin ahih leh vang lungthim lam leh, thagau lam damna hi et fel ngai ahi, atii.

Zephet chun mitam tak zie x-ray la ding chun ka um tau a, mite haw chuh lungthim lam x-ray la ding chun ka ki tieng tau a, pasal khat feltak mai khat hi, amasapen dingin amah chuh ahung ding ta a, lungthim x-ray ahun lak u chuh etngam san le hilo in, a gen le gen ngam loh ding khawp in a result chuh a hung pawt ta a; (1) midangte itthikna, (2) Midingate awhchakna, (3) Chapona, (4) Kilekna, (5) Uonsanna, (6) Kiletsakna, (7) Hi kisakna, (8) Dik kisakna, (9) Duhamna, (10) Kideihtawkna, (11) Lepchiehna, (12) Miawihmawhna, (13) Midang bangmah ngaihlohna, tam tak mai chuh ahung pawt zungzung ta mai a.

Zie phat chun ka lungthim in, zie pa hih amah le fel kisa, miten le fel asak uleh mi tamtak in a pahchak pau bawn zie khu ahih leh, kei kuonle ei pahchak loh pau hih, ki kizahhuoi mai mai ding ahi, tin Vansawlchak kawm achun Hepu, kei vang zie a kilang ding

khun ka ting puoi, ka ti a. Ziephet chun, amah chun ka kawm ah, lau kih micheng cheng zie a khuh kilang vek ding eipuoi, zie a kilang dingte khuh, mah dik kisa te leh taksa felna a Vangam kaih guote haw ading chauh ahi. Krista thihna leh thawhkitna kikawp pihte leh, a thisan a sawp thiengte adingin, Krista ding ding ahi ei tia, zie phet chun ka hung halh huoi ta a.

Zie tawbanga ka um zinglai uchun Pastor khat choir conductor feltak leh, a lasaknau a tel lo te le ngai tha lou te chuh dah kisa mahmah mai aum a. Zie pa chuh a lasakna ding hun uh tun ma ni nih masanga thi ta chuh, dah melpu tak hin a hung a Vansawlchak kawm achun, khuovel a kileh kit dingin a hung ngena, Vansawlchak chun, khuovel a vang chieh kit lo ding na hi. Amah vang chuh thil khat ka hun phalsak hi, zie a pahchakna la na sakna ding uh khawmpi chuh entha thei inla ati a.

Ken le zie chuh hun lemchang a lan Hepu, ken le zie chuh ka enthei dem, ka en nuom na e, ka ti a. Ziechun nangle ka hun phal sak hi ati a. Ka kipak mahmah mai hi. Zie tawbang a a kikhawpnau ka etthak zinglai u chun, conductor chun choir te chuh lasa dingin ahun sam ta a, kei le kithalawptak in ka ngai tha ta a, ginchak banglo hiel in aw chuh zak ding a tawm ten a, numei 2 leh pasal khat chauh aw zak theih in aum hi. Ziephet chun ken, Hepu, bangti dan ahim? Mi ziezah-zah khun sau a mithum chauh aw zak ahimai hi, ka ti a, khuovel a, Pathien pakcha tamtak aum ui, mahleh, lunggil leh tihtak-taka Pathien pakchate aw chauh hi Vangam tung chauh ahi tin ei dawng a.

Chawmkhat zawh in pauchamguolna ahun nei kit ua, zie hun chun le, mitamlo cha aw chuh zak theih in aum kit a, mak hi ka sa deuh deuh ta a.

Thugentu hun ahun tung kita, ziechun le thugentu thugen chuh kichien taka het theih in aum diek puo a, ziephet chun ken Hepu, bang tidan ahim? Thugenpa thugen khule akizamawh na e, ka ti kit a, Amah chun ei hun dawng kit a, “Ngai ah, thil tamtak hun hilh ing ka, zie a thugen na zak louh ziek chuh, khuti hi ahi. Zie a thugenpa khun, a thugen te khu zie haw hi ahi; (1) Pathien pahchak sangin mihiemte a pakcha a, (2)Pathien kawma

kipahthu gen sangin, mihiemte kawmah kipahthu agen a, (3) Pathien in a lungsietna sang in mihiemten a lungsiet dan uh a gen a, (4) Pathien phatna sang in mihiemte phat dan a gen a, (5) Pathienin amah dinga a bawl sak haw sangin miten a bawlsak haw agen a, (6) Pathien lungsietna sangin, mihiemte lungsiet dan agen a, (7) Pathien thu sangin khuovel thu agena, (8) Mite siemphatna ding sang in, mite ngaihnapw ding zawng agen a, (9) Pathien nasepna sangin, amah nasepte agen a, (10) Pathien pahchak sangin, amah aki-pakcha a, (11) Pathien lopina piek sangin, amah lopina aki pie a. Pathien a hinna piepa leh, akilehkit nading sanga, thildang tamtak leh mihiemte lung hawlna a thu a gen ziek in, a thugen te haw khuh, miten chuh a ngai nuom ui, mahleh zie tienga het theih ding leh, Patien kawm tung dinga hettheihloh ahi.” tin ei dawng a.

Ziephet chun, ka lungthim ei subuoi ta a, Hepu, khuti chuh ahih leh mitamtak Pathien nasem a kingai zing ngala Pathien deih bang sem khalo tamtak um ding ahiu hi uo, ka ti a, ziephet chun ahi, na gen chuh adik hi, chieh kit inla, na thil muhte cheng hi mite hettheih dingin zik dawk in ei ti a. Zie zawh chun ka hung khanglo ta a.

Lalpan simtute cheng ei vangsak chiet tau hen.



NANG UN NEK DING PIEU IN

By: B.L. Zawmlien
Santing-L

Matthai 14:16 a thu hih, tuni hi nana ngaihtuoh khawm hitiu. Bangziek in? I mi zuih pau, I Lalpa Isu thupiek ahieh ziek in. Lampi sat hawngtu, Baptist Johan chuh, lungsietna beikei a, thudik a gen zieka melsie taka thah a aum thu, I Lalpau Isu'n a het phet in, nuomlo sa hintin, kong sunga lut in, gangaw lam zuon in a chieh ta a. Mipi tamtak in luipang ah keng in a zui ua, luipang a ahung pawt phet in mite a muh in, a lungsiet ta mah mah a. Nana chi chuom chuom nei haw le a sudam a. Zi haw a a abuo buoi kal un, nitak lam ahung hi ta a, gilkiel hun le hi ta'n tin, a sinsakte'n, mipite chuh a hun lungveit ten tau a, nungak melhawih tak tak le um untin, naupang le huntieng um un au. Tangval hat tak tak le tam un au. Atangpi'n mihiem hih hisel takte ahim hattakte sang in, mi dammawhte, zawnghalte, bengngawng tih haw hih kithuduh zaw ei ve maw? A sinsakte'n le a heu a, zie tak hih gangaw mun ahi a, ni le atak ta a, mipite'n khuo a nek ding ava kichawk theihna dingun, sawldawk in a tiu a. Isu'n amau haw a chiehrawdawk uh angai puoi, "Nang un nek ding pieu in" tih thu a muu hi. Zie thu ka hun suklatna ziek chuh, Sapchuom sunga mawhpukna zal le hintin, thagau lam mita, tulai Krista nungzuite ka vak et chun, I Sapchuom huongsung lim bel, Department chuom lim bel, Insung lim bel a um, mipite, khamtheih chichuom chuom chingte, nu umdan helote, pa umdan helote, naupang umdan helote, nungak-tangval umchin helote, mo umchin helote, haw chuh ka muh in na ka sa mah mah a, mitthi pum in, ka paucham a, "Aw Lalpa, nitak lam, nitum kuon ahi ta a, zie haw hi zie gangaw gam ahin banga ti ta ding um?" ti a ka paucham lai in, Lalpa'n, "Nang un nek ding pieu in" tih hih dawna ka mu ta mai a aw! Ka lunggel a saukhana lawm lawm e, anai anai, Lalpa, chitna thiemna neilo pen, sum leh pai gen ding ka neihloh zie leh mi nuoinungpen ka hih na he a, zie khawvel hih kei a di'n gangaw, liengvaihna gam, ka gel cheng duhthusam mai ahi a, awchakna

gam leh khuolzín mai ka hi a, amau haw nek ding pie ding a nei sawl mawh? Bangziéka kei pen tak kawma zie thu chuh na gen ahim? t'ín ka kap a. Mahleh, Lalpa'n, Matthai 14:17-21 na ah ei hun dawng kit hi. Changthak pek nga leh nga nih chauh aum hi, a ti a. Isu'n zie hin hun chawh un, a ti a. Vang a pie a, pating ngen le mi sangnga val hiel a vah suokkei ui, tih thu hih. Aw! Ahi maw Lalpa, nang thu hi hen, nanga ahi ngal a, ka ti a. Zie dungzui chun, ut leu ut kileu ka veina cheng ahi. Lalpa'n supungna'n a ka ti a, thanuom tak in ka gen thei tai. Ka neih or ka het chule, sinsakte'n amau a ding kham chauh nek ding a puok sang ua le tawm zaw ahi a, midang vakna di'n atawmna lawm lawm e, ka ti sek hi. Ahin, Lalpa piek masak angai hi tih ka mudawh ahi, Lalpa'n a vangsak theihna dingin. Zie a ka lungthima hung um chuh, I Lalpau Isu'n la mita muhtheih loh di'n ei na nusieh ta a, mahleh a thilhihtheihna lamdang ngeilo chuh, a thutiem tawh I kawm ah a um zing nalai hi. Khawvel a nutsieh ding kuon in, "Ka Belamte vak/enkawh ah," tih te, "Kumkhua'n na kawm ah um zing ingka," tih te thilhih theihna nei in hung um un, tihte ahi. Lau puo'ng ka khawvel ma ah.

Aw nau, nang le na mawhpuknate chuh neu maithei, a mite nek ding pie dingin a hun ngen a, na hetsun sun, na neihsun sun, na piek sun sun, na gen sun sun chuh Lalpa pie masa leh chun, Ama'n vangsak in, supung na'n a. I Sapchuom sung ah, I Insung ah, I neihsunte Lalpa pie masa a, malsawmsa a I piek sekloh ziek un, I lawhsam thei, ei mah hetna a I chate I vak tieng a vah chawm thei taluou hi. Ei mah hetna haw, Title haw a Sapchuom an I piek tieng, a hawmvam sek ui. I kibatpih, I chenpih hetna kibang, muhna kibang, zakna kibang, vak dingin atawm taluoi, ziekchun, sinsakte'n amau nekkham phet le Isu a pie masau a, amau tieh sang nga sanga tamle a vah chiet htei ui. Kithawihna hilo in, hehina, lungsietna, title hilo in, mitthi ahi a deih chuh. Mi'n ei hehpih ziek a thau hilo in, midang hehpih zieka gawng. Simtu cheng Lalpa'n phawng halh hen. Amen.



“A SIETLOHNA DINGA DAIKAI...”

(Ezek. 22:30)

By Rev. L. Sata

Sapchuom kivaihawmna leh Kristien hinkhuo ahin sep ding leh etzui a chinsui ding tamtak laka tuni tienga Puitu leh hotu dinmun (leadership) a umte'n buoipih leh etzi pen a kilang chuh zi leh pasal a kineih a, gingu kichenna hi a gunpi khat in a kilang hi. Puitu masate'n le ana chingsui ten ui. Kristien hinkhuo a gitlohna, dan bawhsietna dang dang haw hi khuti taka etzui leh buoipih hi a um taluo puoi. Gitloh chuh gitloh ahi tho a, dan bawhsiet chule dan bawhsie leh sukhiel ahi tho a, hilele, kichen leh kikhen thu tawbanga etzui leh deihzui hiel a um taluo'n a kilang puoi.

Ho-In a kichen leh Pindana kichen hile a kibang tho a ngai pawl um ta. Pastor in a kichensak hitho, Bible chang a sim ule kibang tho, Certificate le achuom hi dieklo tih haw hi genkhak ahi sek hi. Sapchuom in kichenna dan ana siem chinih hi aziek um a ana siem uh hilo ding ahim tih gel deuh ngai ding ahi. Kichenna dan chi nih (2) kisiem hih achuom gel ahi, akibang lo ahi tih kilatna ahi mai puoh dem! Chun, kichen leh kikhen thu ahin atangpi a kizui to zel chuh... danlo a kichengte chuh “Nawhsuoh” (ex-communicate) tha gup tieng ana hi a, Dan thienga kicheng a, kikhen kit chuh Damsung kan ana tiu hi. Zuih leh zuihloh leh mat leh matloh chuh thuchuom in um leh, mi masate thilhih dan vak kisinglang ahi. Achunga Sapchuom thunun dan chi nih (two types) khel ahin, anel-ham, technical problem aum nalai hi.

Sapchuom a kichen leh kimak chungchanga Dan leh muol haw chuh anuoia hin vak sulang hitiu. Sapchuom mipi het chiet ding leh kiven bit theihna dingin, warning or awareness dan in ngai hitiu.

Dan bu pek 82 (b) Kingaihna suola pukte chuh a kichen ngei ngei ding uh ahi. Kicheng leule a kichen mau a kingaihna suola a puik ziek un, THA GUP (6) sung bek thunun a Dan paw a kawih ding ahi.

(e) Kingaihna suol a pukte – kichen dan utlo zaw **kum 1** dan paw a kawih.

Pek 83 (f) Dan theinga kichengte – tha 7 masanga nausen damtaka a pien chun, **kum 3** sung nawhsuoh hi'n a.

(i) Gancha tawh kipawlte **Kum 3** tieng bek dan paw a kaih ding ahi. (Etsakna- atak taka hih ding hita leh, zie nu/zie pa hi ganhing tawh a tasuol u a, nawhsuoh ding ahi. Kuo a ti nuom a, hetpih a pang nuom ding?)

Pek 84 (b) Kichengsa kimate- Mi mazaw chuh **Kum 3** tieng nawh suoh.

Pek 85 (h) Zawlsaih zieka kikhen- Avainung a amau kicheng kit a kikhen sung uh **Kum 3** a tit leh kichen thak sak ngai ding ahi.

(i) Thil khat zieka azi, a pasal enkawl nuomlote- a lang- a zi/ a pasal taihsan pen chuh **Kum 3** thununna piek ding.

(j) Nupan kal buoi- a kigawp kit theihloh u chun, azi/ a pasal ma zaw/khen zaw chuh **Kum 5** thunnunna piek ding ahi.

Pek 86 (i) Dan a zi/pasal nei, kichenna neihma a midang neite chuh **Kum 1 leh tha gup** dan paw a kawih ding.

(m) Dan thieng hi henla, Dan thienglo hileh Pastor khuta kicheng phawt chuh, a kikehn u chun, damsung kan hintin, **Kum 5 tieng** thununna piek a, Dan paw a kawih ding ahi.

Sapchuom in Danlemuol a neih tamtak lak ah a chung a kisulang hi khat ahi a, ngaihdan le tam khawp gen ahi sek a, a thu a zikdawk a simtheih haw hun kisulang ahi. ataka zuih theih vek le ahi dem tih hi ngaihtuoh zui ngai mah mah in a. Achunga thupi guola Sapchuom sunga sietna atun lohna dinga daikaihna chikhat ahi. Chun, Sapchuom in Dan a siem hi Committee a kinga ahi tih le hetkhawm dinga pha ahi. Mihing kipunkhawm, Sapchuom sawmli val, Biel li (4) a kikhen, mipi sanggiet vel um ahih ziekin lam chuom chuoma khantohna ding leh hinkhuo hisel taka a chieh zel theihna dinga daikaih (fencing) a bit leh thamuonga um pawimawh ahi.

Pastor's Fellowship & Seminar 2019 Report

Executive Committee Nulehpate phasakna dungzui in (vide Resolution No. EC/18-08/RES. NO. 15 dated 30th August 2018), a chiehsa August 21 – 23, 2019 sung ESC Secretariat mun ah The 1st ESC Pastor's Fellowship & Seminar chuh lawhting taka matzawh ahi tai.

Zie program ahin, Pastor 23 aki chieh khawm a, amun ah giek den vek in, program nuom taka matkhawm ahi. Zingkal 5:30 am apat Zan lam 10:00 pm tieng, ki chawl man lo a, hun hawmthawh tak a mat ahi. Program hih atangpi'n anuoi abang ahieh mat ahi.

1. Zie program a thugenna hih, Pastor pensioners - Rev. Nekkholam, Rev. Chungkhosat leh Rev. Khaigin Gangte te'n amang ua, Pathien thu leh amau hinkhuo apata ana tuok teu apat in, a sem zinglai te a dinga hetngilh theih lo ding thupha tamtak ei gen sak ui.
2. Seminar Paper 'Deeper Spiritual Life' tih thupih mang in, Rev. S. Thangcha leh Rev. T. Kampu apata ngaihthak ahi a, a hun hun a na mat zieng ding matchak tamtak sinsakna dawn ahi.
3. SWOT Analysis: Rev. Thangkhosiem makaihna'n ESC Sapchuom thu ah, SWOT (S-Strength, W-Weakness, O-Opportunities, T-Threats) Analysis neih ahi a, Sapchuom chiehzawm zel na dinga thil pawimawh tak tak gen khawmna hun nuom tak neih ahi.
4. Zek leh Chan chungchanga kibang taka (uniformity) bawl ahieh theihna ding in holimna hun hawmthawh kawm kawm a gen khawm ahia, mimal tin in lunglut tak in, Bible tawh kituok theipena, zeklechan nasep septheih ahieh na ding a guntak leh nuom taka holim khawm na neih ahi.
5. Sharing & Prayer Fellowship: Zan cheng leh, mimal tin in, sharing na hun mat ahi a, chun, khat leh khat ki paucham tuoh sakna hun leh, sapchuom te a dinga paucham khawmna hun nuom tak a mat ahi.

6. Pastor's Fellowship kimat khawmna apat in phachuom leh pawimawh sakna lientak a um a; Pathien lemsak ahih chun kum kit 2020 ah matkhawm kit ding thu deihdan genkhawm ahi. Alem theih chun, Rev. T. Kampu, President Asia Antioch Seminary (AAS) Guwahati in kiphah taka a zintun nuom thu agen leh akiphahna a sulang a kipah a um takzet hi.

Zie program lawhting taka ei matsaktu Lalpa Pathien min lopi pahchak in um henla, chun Executive Committee Nulepate, Sapchuom mipite eina pauchamsaktute leh thilpiek hun piete cheng cheng chungah kipak thu ka hun gen ui. Zie program hin gah hawihtak ahun suoh zing theihna ding in nei pauchampih nau ka hun ngen sawn sawn hi.

Ka kipak hi.

Pastoral Committee thasang in,

Pr. Khailalsiam

Secretary

Pastoral Committee



NAZARET ISU AHI DIE, KHAWVEL THIL?

By SM/Clk Paukhawgin Gangte

Kum zabi I galkaih utawh kitawn in hetloh kal in I gam in Centenary le lawhting tak leh thalah taka mang zo in, mun tina sapchuomte le Lalpa vangsakna chang in I kivawkto sang man hiel un alang hi. Mun chuom chuoma Centenary holimna thawmgi le akithiel tak gingchak aum hi. Abang chu hileh, tulai Sapchuomte, Gam/Nam mawhpuotute leh mimal hindan leh nasep dan haw hi I et viela, I ngaihtuoh tiengleh, a nieknung I zuih uh Nazaret Isu sinsakna lampi zui I hui em, ahilhloh leh Sapchuom mawhpuokna neih zieka alo thei loa ngai a zui, Sapchuompihte masanga muolpho/zahchak khuol zieka zui ham ham leh mipi kipunkhawm tam thatlawp leh phur zieka zuitu ginum guola lang maimai I hui em tih hile hetkhen thiem ahak hi. A leh, a nung I zuih uh hi hechien lo in, Nazaret Isu hilo Isu dang nungzui a, aning akala taiviel viel I hi zaw ding um maw! tih le hetthiem ahaksai.

1. Korinth khuo ah mi khenkhatte'n Sawlchak Paul kha Pathien guot le hilo, Sawlchaka kisiem kawm alem mai mai ahi ti'n a gen uh a. Ama'n Sawlchak lem ahilh leh hihloh aphawchientute chu a thugen pawm tute leh, a phuhdawk Korinth khuo Sapchuom mite ngei ahilh zie gen in, nanghaw hi ka lehkha, micheng cheng sim leh het chuh na hui hi, ati a. (II Kor. 3:2). Zie chule deihkhawp lo in Korinth khuo a Kristiente chu khawvel mite heta Nazaret Isu hindan sulangtu leh takdawktu "Krista lehkha" ahihzieu le a gen zui ngal hi. Khuti guol chun ei haw Gangte Kristiente hinle I hindan hawu hin bang tawbang Isu ahi die ataklat sek hi. Nazaret Isu kha ahi die? Isu dang tih hi suta ngaihtuoh kham ating hi. Khutichun, I nitin hinkhuo ahin kuo sinsak na lampi zui a hinkhuo mang I hui em, mahnia kiphawtchien zel zel angai hi. Nazaret Isu hindan pawimawh khenkhat vak taklang hitiu.

Nazaret Isu chu khawvel lopina nungngatsantu ahi. (Mathai 4:9) Judai gam thaleka Setan in Nazaret Isu kawm ah, zie khawvel gam lopina cheng cheng leh hauhsaknate man tawm taka chawk ding in a zawk thu I muu a. Thingtang tangval, khawsathei tak le hisam lo, himahleh, mi cheng cheng amah lama hipguo a pangte ding in etlah um ngei in a. A thiltup a sukpititna ding in hauhsakna leh lopina hi amah ding in apawimawh masapen le hi ngei in a. Zie guol hin ei haw le Manipur gam ahin MLA di'n ki-candidate ding hita bang leng, sum leh pai huntieng tak neih masak loh chun ut lengle ki-candidate haksa ten mai in a. Himahlele, Nazaret Isu chun khawvel hauhsakna leh lopina manga gam dindawk deih lo in a haihsan mai ahi kha.

2. Gangte Kristiente hin vang chu khawvel lopina, hauhsakna leh nawpchenna thalah leh hawl in I kikhelhel viel lak lak u a. Mi chan bang, chan loh khak ding lau leh mi channa bana le chan guo tei tei in I phu viel sau sau u a. Sapchuomte lak ngei ale lopina leh mi ngaihsan hih ut ziekin kithagau mi sak leh kitawmngaih sak mah mah zieng haw na tieng le I um tau in alang hi. Nazaret Isu vang kha chu zie tawbang hih mi kha hilo hiel ahi. Ei haw hila lopinate, nawpsaknate, hauhsakna leh mi ngaihsan I deih ziek ua Isu zui I hi zaw hoh tau em tih theih hiel I hi tau hi.

Nazaret Isu chu lu ngakna neilo Isu ahi. (Mathai 8:19-20). Dan sinsaktu khat Isu kawma a hunga akawm ah, sinsakpa na chiehna cheng ah hun zui ing ka, a ti a. Isu'n bangmah danga dawng lo in mihing chapa'n lu ngakna ding him him a neih loh thu'n a dawng a. A pien ding zan khanle khuolbuk chang zo talo in, bawng in ah a hung pieng hi. Nazaret Isu khan vang, In leh lo gen takloh in mihing society akhan le mun a chang lo him him ahi kha. Lei a, a lenlai khan phakte a sudam a, mitdukte ahihvak sak a, kengbaite keng in a chieh saka, mithite le a kaitho a. A chiehna lam lamah mipi'n a vawk hut hut u a. Khutia mipi'n a lawp lai u khan Jerusalem khawpi mun hawihpen ale Inmun patta umsa le a neih zieng theih ding dan le um mawh puo'n a. Himahlele, apa nasepna dingin haksatna siemtu ding leh a subuoi thei ding, In leh lo in a kisubuoit ut puoi.

3. Lei a, a sapchuomte hilah Inmun khat le deihkhawp lo in, chawk beh ding hawl viel viel zieng. Thingtanga umte'n phaigama Inmun khat bek neih guo tei tei in, chawk ding a hawl viel viel u a. Phaigama chengte'n mun thupi zaw leh aman tamna muna chawk ding a hawl zel ui. In leh lo le mahni lawkna ding ngen ngaihtuoh in nicheng in I lungthim, ngaihtuohnateu leh tha leh zung seng in I mang bei mai sek ui. Akilawm leh kilawmlo le hekhen thei talo in, Pathien hetna leh lauhna le nei thei talo in ahuih in I huikhawm u a, ei sanga haksate leh chagah zawte chan sik na tieng le laksak ngap nuom hiel in I um tau hi. Hiti lawm lawm a In leh lo, mahni kituomlumna ding chauh ngaihtuoh a thalah mah mah zieng, mahni phatchuomna dinga dim Kristiente hin chu Nazaret Isu nieknung I zuihloh uh hilo maw! Aleh, kuo nieknung zui I hi tau hi le?

Nazaret Isu chu mitak danglam ngei lo ahi (John 14:6). Nazaret Isu'n keimah hi lampi leh thutak leh hinna ka hi, a ti a. Nazaret Isu chuh Pathien tak, a taktak Pathien, a kisiem kawm pathien hilo, Pathien tak, danglam ngeilo (Khawvel kisiem maa le um ta, khawvel beihnunga le um ding Pathien ahi). A kisiemkawm pathien chuh abil langkhat lien, amit langkhat neu, asam, khut, keng leh bang cheng a kisiem kawm ahih ziekin demna ding tamtak aum hi. Nazaret Isu vang chu Pathien tak, mihiem taktak le ahi zel hi. Mitak ahih ziekin amah achun "Ahi leh Hilo" akipawlkhawm thei puoi. Zo leh ginleduop amah achun aum thei puoi. Nazaret Isu achun danglam hun, thawmhauhna leh lunghel chang tih haw hile aum thei him him puoi. Amah chu a kipei danglam ngei puoi, khangdawng lai, chauh lam leh a teknung tih le aum thei puoi. Nazaret Isu chu danglam zung zung leh ei guola kitheng viel hethut ei puoi, Thangni, tuni leh kum khuotuong in angei ngei ahi zing hi (Heb 13:8).

4. I gam sunga unau khenkhat Nazaret Isu zui dik kisa haw hin kuo Isu ahi dem a zuih uh? A sapchuompihte laka tel zahchakpih in, Sapchuom dang pang bel in, a ulenaute lainatna leh khawksakna sang in, mahni masielna maia dim in, Nam changkang zaw laka tel deihtel zaw'n, ahung upat tieng leh, a suohpih leh a chi/nam ngaihnatna ahun nei thak ui, ti leng kigen

khie! puo'n a. Zie tawbang sinsakna haw hi Nazaret Isu lei a, a lenlai khan ei hilh lam Bible ah akizik puoi. I lak ua zie tawbang hehpihna leh lainatna tello sinsakna haw hi, I Nam/gam sung a um kit taklohna dingin hahpi'n Pathien buon hitiu.

Sapchuom lak ngei ahinle, phachuomngai taka Pathien nasemtu a chi/nam hehpih/lainatnaa puihhuoi sangin, ei lehngatsan in, ei kihetloh sak sek ui, khenkhat vang ei gamlat deuh deuh u a, a suohpihte thawmhau tak leh thasie takin a nusieh un, apawi mahmah hi. Lawiupa khenkhat suon-um leh muonum tak leh fel taka lang ngal, ahiehziaka lunggel siel leh suol tak ana hi zaw daih tih bang le a um sek in, akhawk mahmah hi.

Zie tawbang gingtu thutakna, hehpihna leh a Chi/Nam lungsietna himhim neilo in bangti'n mitak Nazaret Isu nieknung zui I kitih tih zieng diu ahim, Ahihloh leh, Isu dang Gange te Isu zui I hi zawu em, avel in kikhuolchil zel zel leu hin I Kristien hinkhuou hi I mat dik theih zawk uh gingchak aum hi.

Nazaret Isu khan, kei belam chingpa pha ka hi, ka belamte'n ka aw a zau in, anatnateu ka tuomsak sek in, avakmange le ka puikhawm sek hi, a ti a. Ei haw'n le, zie tawbang belampu pha chuh I neih theihna dingun Lalpa Pathien kawmah paucham zing hitiu.

Nazaret Isu'n kuonle ei zuih a nawp chun nicheng in a kross pu'n ei zui hen a tij (Luke 9:23). Zie hi Nazaret Isu ngetna hi zaw lo in thupiek (order) zuih dinga a piek ahi zawi. Kristiente hin kross pulo a Nazaret Isu zuih a guot ziekun unau tamtak thagau lam ah lawhsam in suonlam ding tamtak a neih lawh sek ui. Khutichun, patepna leh thepna achung u a atun tiengleh ding zolo in chau leh puk in a nungtawlh mai loh chuh hihtheih dang bangmah aum puoi. Aziek chuh kross a puok loh ziek uh ahi. Khenkhat Krista a, unau deihtakte hin, mahni Kross puok ding leh a puok dan ding helo leh thiem lo a um sek ui. Khenkhat in a insung haksatna, vangsietna atuok tieng ahim, ahihloh leh a chate'n a thu a matloh ziek in ahim in, ka Kross puok hi ka khawp tai a ti mai sek ui. Zie chu Kross puok umzie ei puoi. Nichenga khetden I hihna chuh puo a, I zuih zawk diu ahi. Zie umzie chu Nazaret

Isu chu gitlohna lam ah a thi a, Pathien lam achun a hing a. Nang leh kei chuh gitlohna lama hing in, I khut leh kengteu gitlohna lama zak in, kal I suon sek ui. Amahvang chu, gitloh lama hinga kalsuon leh khutzak kit talo dingin amah taksa ngei in thing Kross akhan I gitlohteu puo'n khetden in a um a. Nang leh kei gitloh lama hinga khut leh keng zaka kalsuon sek kha, zak kit leh kalsuon kit talo ding in, suolna neilo khut leh keng kha thinga khetden ahi zawi. Lalpa chuh pakchak in um hen, zie guol chun ei haw'n le nichenga Kross puo a I zuih zawk diu ahi.

5. Kross puo a hing umzie chu sakawl sawihzawisa chungga chu tawbang ahi. Sakawl hel (Zuol lo) chungah kuomah chu thei lo in, a chungga chu guo cheng athingtha sek hi. Ahinvang sakawl sawihzawi thiemte'n ahun sawih tak tak tieng uleh, apu deihna lam lama tai viel in, a utna lam lam ah akihei viel sakin, achawm kai sek hi. Apawimawh pen chu sakawl in amah chungga thu nei talo in, amah chungga chu thu thua a chieh viel guol in ei haw le I chung ua thu nei Lalpa ahi ti he'n, Amah deihdan dana uma, ana sem ding leh zui ding in Lalpa'n a thisana ei chawk ahi tai tih hezing hitiu.

6. Unau deihtak, I sapchuom sung, kalh leh a subuoi thei ding zawngin ngaihtuoh tamtak hung piengdawh henla. Khawvel ahin, mihiem in a ngaihtuoh phak loh haksatna, sietna leh manthaina huosie tak leh maktak tak hungtung henla, I lunggel ei subuoi thei ding leh lauhthawwna ding ngen in hung dim lele, taisie mai puoi tiu. Hezekia chun, Assuria sepaihte'n ma hunsawn in Isrealte hun do ding ahiu tih a hetphet khan, Isreal mipite chuh samkhawm in, a melma lam ua pan sang chun ei lama pang chuh Lalpa ahi ti'n, a thamuon guol khan ei haw lama pang chu Lalpa ahi tih hengilh puoi tiu.

7. Suohpihte, mihing kitaihsiekna lam ahin kuomah phak zawhna umlo in, mahni nek khawp le hawl dawh zolo khawp in liengvai, gimthei leh thawmhau in um leuhingle, lungkielo in Nazaret Isu hi bel tuntun zawi tiu. David in a melma Goliatha kha amah sangin a lien in a hat zawi tih he mahlele, amah mai hilo ding ahi tih a hechien a, ava cho a, Isrealte Pathien minin a melma chungah zawhna chang in, lopi taka chawihmawi a

aum guol in, ei haw le, taksapna leh haksatna'n I insung tuom vel henla, kipahna sang in lungkhamna ngen in ei lamtuoh zing zieng lele, Lalpa Pathien I lama pang ahi tih hengilh lo in, lungkie lo leh kinem tak in Nazaret Isu hi bel tuntun leuhing, bangkim I phatna dingin aman hun ngaihtuoh zel intin. Dan leh haksatna leh liengvaihna chung a guolzawhna lopi tak chang dinga hukdam I hi zawu ui tih hung kilang pai zieng in a tih gingcha lah puoi tiu.

Tuni hin, unau tamtak mihing khawksakna lama gimthei leh haksa taka khawsa hingal, nekkhawp lawhdawk ham ham ahih zieka khawvel kipahna lama a lungthim leh ngaihtuohna dettaka kawih zing, chep leh muom leh khamtheih lam ngena lungthim/ lunggel suhaua a, sum leh pai leh khawvel thila lungthim sudim zing zieng haw hi, vangam chang lo ding leh gawtmuna kimudawk ngei ngei dingte ahiu ui. Zie tieng chuleh vaigei ta'n a.

Mihaua pa khale gawtmun ah a kihedawka, a pienpih unaute a geldawka, himahleh, avaigei tai. Unau deihtak, khawvela I umsung ngei uhin deihtelna hi siemfel masai tiu. Nazaret Isu chuh I neih ngei ngei diu angai hi.

Job, in Pathien lopi zie a vaksuta, tuisuohgiet a ngapi kithawlh viel zul zulte, Leviathan vun khauhtak kithuoh khepkhupte avak thil vel a. A siemtu Pathien chu a lopi na maizen e, a ti a. Pathien lopina taktak avak muhdawk chun, Pathien masang ah bangmah ahihloh zie a kihedawk a, " Bila zakna mai chauh in ka hun na he sek a, Mahleh tuhin vang ka mit ngei in ka hun mu ta a. Zieziek chun ka kiten in, vut leh leivui laka chun ka kisik tai a ti." (Job 42:5-6)

Unau deihtak, Pathien thu-awihna chun mihiem hinkhuo thanguoi leh kihdak-um chenga hi thiengtho in, gitloh lungheina ei siemsak sek hi. Zieziek chun, bila zakna mai in lungkim mailo in. Job guola hechien leh a muchien sapchuomte hiding in I umna chietu ah, athaka panla thei ding leh amah deih zawng sema, kal suon chiet ta ding in Nazaret Isu min in avel in ka hun chiel hi. Lopina Lalpa chang ta hen, Amen.



ISU KRISTA KROSS PUTPIH SIMON INKUON CHANCHIN AKIPAT IN HOLIM HITIU.

-Evang. Lamzagin

Kristien insung ettawntak mahmah Simon te inkuon hi I Bible ahin a chanchin atawm mahmah a, himahleh kristien insung kipuokna lam ahin mi ettawntak mahmah ahih ziek un, a chanchin uh hi chawm mahleh suklat ka ut ziekin Kristien insung ading a I phatchuompah ngei kinem in ka hun zik ahi.

I Bible a Simon chanchin kimuhna, Mark 15:21; Matthai 27:32; Luke 23:26, ziewaw hi sim hitiu. Lampi achun mi khat amin Simon kiti agam apat a khuopi a hung chuh a muu a, zie chu sepaihte chun Isu Kross pu ding chun apawng mat ua (Simon chu Kurian mi, Alexander leh Rufas pa ahi) Simon min umzie chu Hebrai pau in, "Shama" Lalpa chun deiloh in ka um hi, tihna ahi.

Bible ahin Simon hi atam mah mha a Simon minpu hi kuo (9) aum hi.

- (1) Simon Peter - *Matthai 4:18*
- (2) Simon Zealota - *Mark 1:16*
- (3) Simon Miphak - *Mark 26:4*
- (4) Jus Iskariotpa Simon - *John 6:11*
- (5) Simon Dawithiem - *Nasepte 8:9*
- (6) Simon Joppa khuo a savun siempa - *Nasepte 9:43*
- (7) Jakob chapa simon - *Thilsiembul 35:23*
- (8) Isu vangsaktu Simon - *Luke 2:25*
- (9) Kurini mi Simon - *Mark 15:21*

Kurini hi Africa gam a khuo khat ana hi a, zie akipat chun Simon hi Judate kut thupi tak khat mang dinga Jerusalem a hung hiding ahi. Zie kut hi Chiehkan Kut chu ahi. Mosi lawi in Aigupta a anamat pat ukha ahi. Zie Chiehka Kut hin a etsak chu Isu

Krista, Pathien belam no a thihna ding etsakna ahi. “En tiem u, Pathien Belamno, vannaui gitloh la mang pa khuh! (John 1:29). Isu Krista a taktak a, a thihna ding Kut chuh mang ahiu hi. Pathien belamno, Lalpa isu chun, nang leh kei gitlohna hansie dawl kross chu hun pun Calvary lam zuon in Juda mipie leh Rome sepaih ten ahun pui ua, simon inle zie chu va zui hiding ahi. Sepaih ten Simon chu ana man ua, Lalpa Isu Kross put pih dingin Kross chu a chung ah anga tau hi. Simon hin bangtin ngai din na gingcha? Judate khenkhat guola a muhdah pawl a pang ahih chun, a lungnan tin, azak le cha ding ahi. Ahin, Isu Krista hi pathien chapa ahi tih gingcha ahih chun, kipak tak kawm in Kross puding in ginchak aum hi. (Luke 9:23) Kuole ei zuih anawp chun amah gimtheihna khawksalo in I nitin kross pun ei zui hen.” ati. Lalpa Isu Kross hi nicheng, hun cheng a pu zingzing te chu thagau a vangsakna dawwna bulpi ahi. Nang leh kei hi nichenga, hun cheng a kross pu zingzing din ei deih hi.

Simon zi: Simon in chapa nih (2) anei hi tih akimui. A chate chu Alexander leh Rufas ahiu. A zi min vang akigen khapuo. Simon zi hi mun khat chauh ah thupitakmai in akilang hi. Sawlchak Paul in Rome 16:13 na a, “kei nu le hi khah,” a tih theih numei, numei thupi, numei pha suongmantam sanga mantam zaw (Thuchingte 21:10), atih hi ding ahi. paul in kei nu le hi a tih hi, a pienna le himai thei, hilo maithei, abang chuh hitaleh, nu ting, nu mantam, kristien te nu, thagau lam nu leh nu thupi khat chu hi ding ahi. Sam 128:3 na zi chu na insung gil achun grep gui gah nuom tak bang in um in tin, grep gui gah nuom tak kizawp pih chu Isu Krista ahi. (John 15:1) Isu Krista grep gui tawh kizawm zi/nu chu tamtak/thum tak in gah ding ahi.

- (1) “Ka nu guol hi nu cheng cheng ana hita leh suongkul ngai puon a.” – D.L. Moody.
- (2) “Pasal te thahatna bulpi pen chu zi pha ahi.” – Martin Luther.
- (3) “Nu pha ei pien, khutichun nam pha hung pieng ka.” – Napoleon
- (4) Nu kituptak makaihna chu hotu 100 sang in apha zawi.

- (5) “Ka thiemna leh dinmun thupi ka neihna hi ka neulai in ka nu’n bible thu ei na hilh te ziek ahi.” – John Ruskin.
- (6) Nupi khat in, “Tun chuh, ka chate pastor leh missionary’n ka sawldawk ta a, keile pawlam ah sapchuohte nasepna ah tel thei tang ka.” ana ti.

Simon chate, Alexander leh Rufas: Simon chate Alexander leh Rufas chanchin hi Bible ahin mun khat geggel ah muh in aum hi. Vaksim hitiu, tichun, Alexander chun mipite chuh thip dingin khut in a vakzap a, micheng-cheng te kawm achun amawhlohnau thu gen a guo ta a. Nasepte 19:33 .

Simon chapa, Alexander nasep phat ziehin ahung kilang ahi. ephesi khuo a mikhat a min Demetries, dangka guo a pathien nu Diana lim siem pa chun, mipite kawh ah, I neih zawhnau hi zie nasepna hi ahi, tih na heu a, zie mipa Paul thil hih hi nangmau ngei in na muu a, na heu hi, amah hin khuta siem pathien haw hi pathien ahipuou tin mi tamtak a thempai a, a zota a, Ephesi khuo mai hilo in Asia gam sung pumpi ale. I nasep uh minsiet ding lauh um chah hilo in, pathien nu lopitak Diana ho-In hiel chun ngaik tam lawh un au. Asia gam mi chengcheng leh, khuovel mi’n aho sek uh hi, bangmah lo hung suok in a lauh aum hi.” ati a. Mipi a zata phawt chu a lung uh ana mahmah taua. Ephesi khuo a diana hi lopitak ahi, tin akiko ua, khuopi sung chu abuo ta mahmah a, paul nungzui Gaias leh Aristarkas chu aman ua, kintak in etnawpbawlna in achun a taihiph tau a. Mipi chengcheng chu buoina mai in abuo tapuou hi. Zie phat chun, Alexander chu Paul leh a lawite chu panpih in a khut zak in akiko dawktai. Mipi chengcheng chu thip dingin a khut in a vakzapa, mi chengcheng kawm achun amawhlohnau thu a gen tai. Alexander in paul leh a lawite hi nasatak in a panpih hi. Awle, Lalpa isu Kross putpih Simon chapa upa zaw hin Isu chanchin gente hi apanpihna I mu hi. Isu Krista hi pathien chapa ahi tih gingtu/pawmtu hi ding ahi. A paw loh chun pathien mite panpih puon a, hiti bang hin umpuon a.

Simon chapa anezaw pa Rufas, chanchin hile I Bible ahin atom hiel puoi (Rome 16:13) Lalpa tel Rufas tih hi, Rome khawpi a mi thiengtho 27 teldawk te laka hi Rufas hile khat a ana tel ahi. Paul

nasepna ahin a kithuohpih zing zing hi. Krista ading a kikawih chuom, mi thiengtho, nungzuitu, ginum leh thih tieng a zui tu ahi.

Nulepa te haw, Lalpa na I sepnau ahin leh Lalpa nung I zuih nau hin, gim leh chawl khawk slo in I pan angai hi. Krista'n nang leh kei a nungzui dingin ei dieh hi. Ni chenga gimtheihna khawksalo a, a kross pu a a nungzui din ei deih hi.

Simon inle gimleh chawl khawk salo in, zahchakna ngaidau inleh muolphona ngainep/dau in, lalpa Isu Kross a putpih a, mahleh a zi leh a chaten le amah nungzui in haksatna thuoknap in lal Isu nungzui tu ginum in aum ui.

Lalpan a thu hi vangsak ta hen.



MISSION COLUMN

1. “Hung unla ei hun panpih un” Nasep. 16:9 tih thupi manga, Mission Conference 2019 ina mat uh gahsuoh to zela tuni tieng ei puitu Lalpa Pathien Pahchak in um hen. Missionary Supporter a punto zel a tuni tieng (September 10, 2019) tieng in mi 168 I tung tau hi. Lalpa pahchak in um hen. Tuchung a hun pangthak te leh tawmngai taka ana pangstate chung ah kipak thu I gen a Lalpan amau puizel hen.

Tuchunga hung pangthak hih K. Laitui apat ahiu a, a min uh ka hun taklang hi. ta hen.

- 1) Nu Niengboi
- 2) Nu Hoihnieng
- 3) Nu Samantha
- 4) Pa S. Paul
- 5) Tv. Kamlalven
- 6) Tv. Nekthienmuon
- 7) Tv. Janggougin
- 8) Pu Hemlun

(1) Ithing Ho In sakna chieh tha zing: Ithing mun ah Ho In sakna chiehtha zing in, Foundation, A Khuom leh a Beam (azawl) tieng zawh ahi ata a. Sum leh Pai lam taksap ziek a chawm khat chawl dinga a ki um lai in, kipak um tak mai in Synod HQ. Church te'n a Tuong – Sât kei un hun sun sak ing kau a tiu a, a kiphah nau hih ngaihsan a um in kipak a um mah mah hi. Tu hin a Sât sunna ding buoipih lai tak ahi a, September thasung ngeia sun zawh kinep aum hi. Chuleh, tuchunga zie Ho In a dinga tawmngai hun suoh a Fund Raise a hung kibawla kiphah taka hung pang Sapchuom – Gangpimuol, D. Phailien, Chiengkongpang, Gangte Veng, Bijang, Bunglon leh mimal hung pangte cheng cheng chung ah kipak thu ka hun gen ui.

(2) Tripura Mission Field adinga Central church hawn dawk hi ding: Hunsawt tak Sapchuomte'n ina buoipih uh Lefunga mun ah 'Synod Central Church' chuh hawndawk theih ding in a um ta a, Pathien lem tih ahieh chun September 14, 2019 (Saturday) ni leh Rev. T. Kamgin, Executive Director in hawn dawkna nei in tin, Rev. Letthang, Field Superintendent in a latna nei ding ahi. Lawhting taka hawn dawk ahieh a, sapchuom te'n a lawk theipen a ana mat theihna ding un paucham pih hitiu.

(3) Doi mun ah Evangelist Quarter hawnna um ding: Lamphel Sapchuom leh Nu Mawikimte Inkuon in asak uh, Doi Para mun ah Evangelist Quarter saka um chuh tuhin, hawn dawk theih vang in a um ta a, Pathien in lem atih chun, October 09, 2019 (Wednesday) ni leh Rev. Letthang in hawndawkna nei ding ahi. Zie In hih lawhting taka hawn dawk ahieh a, a umte'n Lalpa leh A gama dinga hat zaw sema a septhiehna ding ua panmun pawimawh tak ahieh theihna ding in paucham pih zing hi tiu.

(4) Tripura Mission Field a ding Bolero – ZLX chawk ahi: Lalpa leh A gama dinga nasepna a pawimawh mah mah mai, Gari, Bolero – ZLX September 08, 2019 ni'n chawk dawk ahi tai. Taksa leh Thagau lama eivangsaktu Lalpa Pathien lopina chang hen. Zie Gari hih alawkthei pena mat ahi a, Lalpa gam lienaw sem ilakna na ding ua namat pawimawhtak ahieh zing theihna ding in pauchamna'n delhzui zel hitiu.

KRISTA LUNGTHIM KHA NANGMAU AH UM HEN

(Philippi 2:5)

Rev. Ginkhosiem Singson

“Zuihding danpha sangin, ettawn tak umchanpha gamchengin aphazawi.” – DL Moody.

Isu ginchak zieka suongkul tang a, na chungthu tanna ding nikhuo naicha a umdan in vak kigel tie (Zie tawbang thu hi khawvel mun chuom chuoma gingu te chung a tui chana tung zing ziang ahi). Zie tawbang lunggel na neih lai hin lehkhathawn zik dingin hun hun kipie taleh kuo nathak in bang thu nazik die? Chuleh kuote kawma paucham sakna na ngen die? Khuti tawbang haksatna hi Sawlchak Paul in 60 AD vela ana tuoka, Rome suongkula atan laitaka Philippi Sapchuomte lehkha athak na ahi. Philippi lehkhathak hi simleh chin Paul hin bangbang azik ahim mak nasak mahmah dingle tampi mu ding nahi. Ei haw hileu hing I gimtheih I haksatnau ngen kizik maithei ahi. Ahi'na, Paul hin haksatna atuokzing lai inle Sapchuomte atilkhoh thei hi.

Sawlchakte lehkhahu bung 16 na I sim leh, Paul in, “**Makedonia Sapna,**” a zak nunga Europe gam aphak masakna pen khuo chu Philippi khawpi ahi. Philippi khuo a Isu Krista taksang masa pen chu sumkawlvei numei Lydia ahi. Amah hin Paul leh Silas chu a In ah a umsaka, Philippi khuo a gingu te a dinga muni chu amah In hi ahi. Zie mun a kipat chun Pathien nasep in ma ahun sawn zel hi. Philippi khuo a thiltung melchiktak mahmah khat chuh, Paul leh Silas suongkul ta'n sunga suongkul ngakpa leh a inkuote Isu taksang dinga asiem ukha ahi. Amau te nih a ding chauh ngaihtuoh hileu, lei ahung li'n a, akawlbuuh uh ahung kiphel a, suongkul kawt ahung kihawn khan tai dawk daih ta ding ahiu hi. Ahi'n lah, thagau mangthai ding gelkhawkna ziek in suongkul sunga khan, “**Hukdamna Camp,**” ahun bawl malam nalai ui. Philippi lehkhathak chipchil taka I sim leh Paul in Sapchuomte ngaina ahidhan leh vatawhtha nuom ahidhan

akimui. Ahihziekin, Sapchuom sunga buoina, kibung khenna, mahni kingaihuluna, leh phunchiekna a um thu, chuleh Juda missionary hawn a vausal zieng nau, tih haw hi kisuonlahna neilo hiel in imsum bei kei a aheth suok kei ding un azik tha miet miet zieng hi.

Paul in, Philippi sapchuom sunga buoina haw sukdaihnua ding a thilkhat umsun chuh, Pathien ngaihsakna leh Krista lungthim bang put hih ahi, atii. Eihaw laka, mimal, insung, Sapchuom, khuosung chuleh kilawikhawmna himhim a buoina umsek haw hi Krista lungthim bang puchiet leu hing suknavak theih hiding ahi. Krista lungput aneih chauh uh hilo in, sapchuom te'n a ettawn ding uh amah (Paul) ngei, a sep khawmpih Timothe, Philippi sapchuom enkawla pang Epaphroditus chuleh ginna a mipiting haw umdan entawn dingin atii. Mitin in Krista umdan leh alungthim bang nei chiet hileu amau haw le midang te a dinga ettawn theih hi ding ahiu hi. Philippi sapchuom te'n aseplebawl ding uh kama agen chauh hilo in umchan leh chawndan a mite ettawn theih leh zuih theih a aum ding uh ahi, ti'n agensak hi.

Paul ettawntak ahihna: Paul in Krista lungthim bang aputna chuh, amah a ding gelkhaw zaw lo a, Sapchuomte a dinga akipiek dawka hih ahi. (2: 21-24) Paul in Krista lim athawhna chuh 2:17 sung ah kichien tak in akimui. “Ka hinna thisan chuh...sunthak hilele kipak ingka,” Paul amah le mah mite ettawn theih ding in phat cheng in akisinga zing hi.

Timothe ettawntak ahihna: Paul in aseph khawmpih Timothe hi Philippi khuo a asawl naziek nih a um hi. *Khatna*, Timothe hi Philippi Sapchuomte khankhuo ding gelkhaw mah mah khat ahi. Paul in Krista lungthim bang put ding tia athuhilh, “nangmau a mai enlo in midangte a ding en zawu in,” (2:4) atih hi Timothe hinle ahinpih ahi. *Nihna*, Krista mihiem banga ahung kisiemna (2:7) tih ahih bangin Timothe le Krista lungthim bang pu'n chanchinpha ziekin suok nasep chu gin um tak in asem hi. Tawbanga atawmngaihna leh a kipiekwawhna hi Philippi Sapchuom te'n a na he mah mah ui.

Epaphroditus ettawntak ahihna: Epaphroditus hi Philippi

Sapchuom a member khat ahi. Paul kithuohpih dinga Sapchuom in asawl ahi. Amah hi Rome khuo a achiehna a lamkala damlo malam ahim ahihloh leh khuo atunnunga damlo ahim tin vang akichien puo a, damlo ahih chu het ahi. Zie adamlohna hi Philippi sapchuom te'n le apuoknat pih mahmah ui. Paul hin Epaphroditus chu thivang a na Pathien panpih na zieka damkit ahih thu azik hi. Bung 2:30 na ah Paul in Epaphroditus chu Philippi sapchuom te thgasanga amah (Paul) ahunsawl uh ahihdan agen hi. Zie hin Pathien nasepna thivang hiela pang ahihdan ei na hihchien hi. Tawbanga thihchan huoma Lalpa nasep chu Krista lungthim bang pu ahihna ziek ahi (2: 6-8)

Philippi 2: 6-11 sung ahin Krista lungthim bang, lungput a neihna dinga ettawn dinga kigena ahi. Bung 2: 12-30 sung hi Paul , Timothe, leh Epaphroditus in Krista lungthim bang aput nau agen hi. Tichu ahihleh, bangtaw banga, bangtikphat leh Krista lungthim bang chu I put diu ahim? Ei mau chiet ki-en hitiu.



Ngetna

Chamna aw hi subscribe a, Articles a hun pie zing ding in leh subscriber ding hun hawla sponsor hun bawl zel ding in, chun aphung vukna ale pang dingin na tawmngaihnaui leh deihsaknau Pathien min in ka hun ngen ui.

- Editorial Board

LAINATNA

- K. Lienkhothang

Ezekiel 9:4 – Khawpi chu tawhviel inla, Jerusalem chu tawhsuok in, a sunga thil ten-um kihih haw zieka lungkhama kap sek haw chu a chalpang uh a tiemteh in, a ti a. Zie thu hi ka muh in ka lung akhawih mah mah mai a, tulai Sapchuomte laka thil phalo hihte kahpih hi tiemteh leng bangzat apha die aw. I khawsak danteu et in tam taluo di'n ginchak aum puo'n mangthai tampi I kieng I kim a dim a, Tripura, Zonai, Arunachal, Bhutan a gama gamla, I muhphak, I hetphak le hilo, thagau lainat mah mah tih hi chu ginchak haksa thim in ka ngai in. La'n le na kawma thim ah mi a thi'u, thih lungmuonna lah neilo in. Zie hi vak en viel tiemu, Churachandpur sung ahin Sapchuom bangzah phet aum dem, Pawl min ale ABC cheng cheng kimang zo a, pawl zie zat zat hi ki-um a, I kiginchak theih luot ua bang ahim kibang, I kim I vel a, Pathien hing helo, a mangthai zingte lainatna chang helo a kap hih ki-um le chu I kawma le thagau mangthai mat ding tampi um hi I heu a, I muu a lah I lainat puou a. I khawlailung laitak ah zu zuok I kawih ua, a tui chaw tawh, a che chaw tawh kipipha kizen sa mah mah, I pasalteu, I chateu, I ziteu ei vak kham sek ua I buoi zel ua, Insung a Pathien um talo, kiniel kinakna a dim zo ta, a helo, a mulo kihih laklawh le le a ngaihna khat um in ka he'n, mu kisa ngal mulo, he kisa ngal helo, Pathien hi thik dinga cho dawk I guot ham ham uh a bang mai ta a. Lainat chu I um takzet uh ahi. I Pathien uhuh thikthusie Pathien ahi tih hile he leuhing Pathien hing khuta kiek hi lauhum tak ahi. Lum lo vawt lo a I um chun a kam apata sietdawka um ding I hiu ie. Kuo'n bang in ei mu kileule Pathien khut thuok ding hi ka gel tieng ka kap mai sek a, I gen I sak lah kuoma'n bangmah a la ngailo, ka mitthi luonna tampen chuh, I chi I nam te hi ahi. Lengnu Esther in Aw Lengpa na mittung ka hih a, na phasak lam ka hih chun ka deihipen chu ka hinna nei hawihsak leh ka chipihte hinna na hawihsak hi ahi a tih hi I chipih hinna ei hinna hi ahi. Pathien in a deihipen chuh I hinna ding ua a hinna ahung piek hi a nasa hilo maw, ka hinna tan in a thi'i, tih la'n le I sau a, hinna lultan mantam dan hi I he

nai puou em. Esther guola I chipihte hinna hi khawk I sa puou em, a thawhlawm a sawmakhat a pielo aum leh I puonau a, a hing ahim a thi ahim tih ngaihtuoh pha ki-um talo, Thagau lainat a kap a mau ki-um lo, I deih u chu society letna ding, sumlepai ngah ding hi I buoina pen uh ahi. Setan do dan thiem hin ei zo taluo hi uo maw. Khawlai ah zu ei zawksak a, I duh I dah in, I chen ua I cha I nau tampi puimang ta hi bang lawh ta ding I hiu em. Lal Isu'n nang uleh na chateu ding in kap un, a ti a, Thagau lainat a kah hi Isu'n le a ngai pawimawh mah mah ahi. Aziékchu hehpihtu Pathien ahi a, ei uh mangthai ding, lainat a van khuo leh tui taihsan a a van lalchutphah nusieh a lei mun niempen a hung pieng a, Kalvari tanga Kross a hung thi a ei hung tat hi bang ziek dang ahi puo a, I thagau mangthai ding lau a ei taddaw ahi tih hi he leuhing ei unle Thagau mangthai ding hehpih thei ding I hiu a, La'n lautha mangte Lalpa kawma I puilhloh chun, minthang van lal kawm ah bang thimthu I gen dem, thugente'n le thagau lainat in mitthi luong in gen leng bangti'n em thagau I mat loh ding, a Bible gen a, sermon hawihtak gen lengle hehpihna ka neihloh chun dakgi mai mai tawbang ahi, I taksap u chu hehpihna hi ahi.

Thagau hehpihna I neihloh chun thu zakhat genleng le vailaka zunthak bang mai ding ahi. Lengnu Esther guol in ka hinna leh ka chipihte hinna ka deih hi ti a, Ahasuel kawma a nget bang in, lainatna mitthi luong in kap in, sam hitiu. Pathien belam enkawl I hih uleh thuneih utna mai in Belam vak ta puoi tiu, a thisan, mawh uh puo zo puoi tiu, alim thawh mai mai hilo in, lainatna'n sem tai tiu.



Thupi: Kalvari

- Lienkothang

Sawlchak Paul in Kross a a thihna thu tihloh thil dang him him het ka guo puoh kha, 1 Korith 2:2 ah a gen hih I heu a Paul mah in I Lalpau Isu Krista kross lo chu ka suonloh ding, zie mai chuh zieziekchun khawvel hi kei din khetden in aum a kei le khawvel a din khet den in ka um hi a ti a. Kalvari Kross chuh a suong in a ngainan, khawvel tawh kikhennan a mang thei in, aleh en bangtin I mang um? Isu kikheddenna mai in I heu hi, phatchuom pih nan I mang um? Krista Isu a um te chun phehlevo chu a khenden tau hi. Krista aum pienthak te I vak thil viel a Krista hin mun anei tawm mah mah in a kilang tan. Isu Krista lungthim hi na mah mah in a tih hi ginchak aum taluoi

Ei lungthim tiengle ana mah mah zieng a I gam, I guo, I chi, I

nam lak ahin Kross thu liengvaih pih um lo le ahimai a, mah angsung khuolna duh-amna, gitlohna te khen den zo hi ka mu tawm mah mah. La'n ana gen "Kalvari tang lam hin lung in ka gel thei puoi, khawvel thil a ka lung ana dim zo ziekin," zie la hi ei haw tulai sapchuom ding hi abang mai ta a. Kalvari hi Isu Kross a kikhedna tang ahi a, a Kross maile hilo a Tang Kalvari hile miten a tang min Kalvari le ana ngainau in ana la chawih un, Kalvari ana hehpih na chun tihte, Aw Kalvari Tang khu ka vak thil a tih, Kalvari Tang, Kalvari Tang ka ngaihtuoh tawp thei puo ie, tih Aw Kalvari tang chung a chun ka Lalpa dam die dei a ti, Rev. Lungkhai in, "Aw Tang hawih Kalvari miten musit mahleu tang dang cheng cheng sang in ken ka ngaina pen hi." ati a.

Thumak ka gen chim theih loh chu Kalvari chanchin ahi bangtin em Pathien cha chang khat gilo kei ding athih. Awle, unau te haw nang leh kei hinna dinga hung thi ahi tih hi I he chien puou em? Amah I lungsiet ziekin I sapum, I hinna bang pie phal nailo ding I him? I deih I ngaih, I khawvel utnate taihsan ngam nailo I hih

chun thagau lam a hin hawm vam ta luo lo ding I him! Lal nih na la sem kawp thei puoi ting, khawi zaw natel die? Kalvari mawh, khawvel? Kingaihtuoh in.

Lalpan malsawm hen!



PAUCHAMNA A HETDING

Hun leh ni te hung kihei zelin, tu kum 2019 le kum tawp lam tungtou thei dinga hunpha ei siemsak tu, Pathien min chuh pahchak in um taken.

Kum tawp lam I tung tau a, Biel Khawmpi haw le hung nai ding ahih tak ziekin, Biel Khawmpi te haw hi Pathien mapuihna zal a matzawh ahih theihna dingin pauchamnan hezui hitiu.

CHAMNA AW PHUNGVUKNA

B. Aven, Lamphel in Chamna Aw phungvukna dinga Chief Patron a ahung panna chung ah, Chamna Aw Editorail Board in kipahthu a kigen hi.

Pathien in maban ale atamzaw leh a hawih zaw sem thei dingin ama pui zel ta hen.

CHAMNA AW PATRON MEMBER LIST

CHIEF PATRONS:

| | | |
|-------------------------------------|------------------|------|
| 1. Pu S. Paukholal | Chief of Bunglon | 1994 |
| 2. Ebenezer Chapel | D. Phailien | 2014 |
| 3. ESC Shillong | Shillong | 2014 |
| 4. Mr. S.K. Juiliana | Lamphei | 2014 |
| 5. Nk Sawmte K. Gangte | Fujairah,UAE | 2015 |
| 6. Nk Esther Tinglamkim | Gangte Veng | 2015 |
| 7. Pu Thangzago (K.Vawmcha) | Chiengkawnpang | 2015 |
| 8. Langol ESC | Langol | 2016 |
| 9. Mrs Hoisi W/o Laldawng K.Gangte | Jiribam | 2016 |
| 10. Upa Letkam | Bunglon | 2016 |
| 11. Pu (L) Kamgo K.Gangte | Phuolsanbung | 2016 |
| 12. Shillong Local Missionary Board | Shillong | 2016 |
| 13. Pu Lunkholal Gangte | New Delhi | 2017 |
| 14. Pu Noksieik | New Lambulane | 2018 |
| 15. Nemkholam | New Lambulane | 2018 |
| 16. ESC Gangte Veng M&B | Gangte Veng | 2018 |
| 17. Nk. Nancy Nemneihvak | Hill Town | 2019 |
| 18. B. Aven | Lamphei | 2019 |

PATRON MEMBERS:

| | | |
|--------------------------------|-------------------|------|
| 1. Pu Henkhojam | Siempat | 1994 |
| 2. Sep. L. Gangte | 5th Assam Regt. | 2003 |
| 3. Dr. Lalzazdal | Chiengkawnpang | 2004 |
| 4. Upa Niala | Shillong | 2004 |
| 5. Pu P. Gangte | Shillong | 2004 |
| 6. Pu B. Manga | Shillong | 2004 |
| 7. Pu S.T. Gangte | Shillong | 2004 |
| 8. Pu Lalkithang | Delhi | 2004 |
| 9. Rev. Dr. Soson | Dimapur | 2007 |
| 10. Rev. T. Kampu | Guwahati | 2008 |
| 11. Pi Phalneihthiem | Dehradun | 2008 |
| 12. Pu B.K. Gangte | Dehradun | 2008 |
| 13. (L) Hengo | Chief of Chongmun | 2010 |
| 14. Upa Dr. L.S. Gangte | Chiengkawnpang | 2011 |
| 15. Pi Niengzalam | Chiengkawnpang | 2011 |
| 16. Pu Sangvung | Chiengkawnpang | 2011 |
| 17. Pu S.K. Gangte | Shillong | 2011 |
| 18. Pu Lovejoy | Kohima | 2013 |
| 19. Pu Goginthang | Shillong | 2013 |
| 20. Pu L. Minlun Gangte | Shillong | 2013 |
| 21. Pi Lalkim | Shillong | 2013 |
| 22. Hav. H.L. Gangte | Shillong | 2013 |
| 23. Ms. Grace Lalbiek | Guwahati | 2013 |
| 24. Pu L. Neihsiel | Shillong | 2013 |
| 25. Pu Lamtinlien | Shillong | 2013 |
| 26. Pu S. Thienlajoy, | SDO H.Q. Veng | 2013 |
| 27. Pu L. Sawia | Gangte Veng | 2013 |
| 28. (L) Lt. Col. L. Gangte | Chiengkawnpang | 2013 |
| 29. (L) Upa K. Manga Gangte | Shillong | 2013 |
| 30. Rev.Dr. Th. Lamboi Vaiphei | Hill Town | 2015 |
| 31. Pu K. Pauboi Gangte | Chiengkawnpang | 2015 |
| 32. Siemlajoy | Lamphei | 2016 |

DIAMOND MEMBER:

| | | |
|----------------------|----------------|------|
| 1. Upa Lamkhodem | Chiengkawnpang | 2015 |
| 2. Mrs Felli | Chiengkawnpang | 2015 |
| 3. Moizokim (Chloe) | Lamphei | 2015 |
| 4. Pu Lama B. Gangte | Langol | 2016 |

GOLD MEMBER:

| | | |
|--------------------------------|----------------|------|
| 1. Pi Niengneihchoi | New Delhi | 2014 |
| 2. Agape Children Eng. Jr.H/S. | Ithing, Thanga | 2016 |
| 3. Upa Th. Manggul | Bunglon | 2016 |
| 4. Pi Chawimawi | Lamphei | 2017 |
| 5. Pastor Goulienmang & Family | Tripura | 2018 |
| 6. Muntha ESC | Muntha | 2018 |

SILVER MEMBER:

| | | |
|----------------------------------|-----------------------|------|
| 1. Pi Sailothangi Thangzom | Old Lambulane, Imphal | 2014 |
| 2. Antioch High School Abicharan | Tripura | 2014 |
| 3. Upa Thanglal | Bijang | 2015 |
| 4. Upa Laltinhang | Gangpimuol | 2015 |
| 5. Lamneihhat | D. Phailien | 2018 |
| 6. Pu Sonpee S. Thangzom | Lamphei, Imphal | 2018 |
| 7. Pu P.L. Manga | Lailak, Mizoram | 2018 |



PIN

| | | | | | | | |
|--|--|--|--|--|--|--|--|
| | | | | | | | |
|--|--|--|--|--|--|--|--|

Chamma Shw
(Evangelical Monthly)
Regd. No. 64436/96
E-mail: e7s7c7@gmail.com
www.synod church.com

Alak man apat ₹
If undelivered pliz return to:
ESC SECRETARIAT,
Chiengkawpang, Churachandpur,
Manipur - 795158

*Published by Rev. T. Kangni on behalf of the Evangelical Synod Church
Printed at THAWNSAUI PRINTING WORKS, CENTRAL LAMKA.*